

II i  
1566

Wider den  
**Sauffteuffel/**  
Etliche wichtige Ursachen/  
Warumb alle Menschen sich fur  
dem **Sauffen** hüten  
sollen.

Item/

**Das das halb vnd gantz**  
**Sauffen** Sünde/ vnd in Got  
tes Wort verbo  
ten sey.

Item/

**Etliche Einreden der**  
**Seuffer** / mit iren ver  
legungen.

Durch

**Matthæum Friderich von**  
**Hörlig.**

M. D. LII.



# Vermahnung an die Deudtschen.

Du Edle Deudtsche Nation/  
Die du werst aller Land ein Kron/  
So du von deinem Sauffen ließt/  
Seins lobes ein end kein Mensch nicht wüß/  
Las ab / thu buß / dir wird durch Gott  
Mit glück geholffn aus aller not.  
Du sihst fur augen Gottes zorn /  
Das du gedrengt wirst hynth vnd forn/  
Von deinen Feinden manigfalt/  
So auff dich setzen ungezalt/  
Dich zuberauben Gottes Worts/  
Darfür zu lern ein vnerhorts/  
So durch den Teuffel zu nochteil  
Erdocht ist worden deinem heil.  
Dir auch zu nehmen die Freiheit dein/  
Mit der du bist geziert allein/  
Fur andern Völkern dieser welt/  
Derhalb mit rhum behelst das felt/  
Zubringt in ewig seruitut/  
Darob du billich leßt dein blut.  
Dem allem / sag ich / du entgehst/  
So du von deinem Sauffen leßt/  
Welchs ist ein Mutter aller sünd/  
Draus sich ein noch der andern sünd.

*Corporis atq; animi subuertunt pocula dotes,  
Et faciunt ambo sub Phlegethonte mori.*

Dem Edlen / Gestrengen /  
vnd Ehrnyhesten / Erasmo  
von Künrig / Ritter / auff Lobshiz / mei-  
nem in sonderheit groszüg-  
stigen Herrn vnd  
Förderer.



Gottes Gnad vnd Fried / sampt  
einem seligen newen Jar / durch  
Ihesum Christum / vnsern lie-  
ben Herrn / Amen.

Gestrenger vnd Vhester lieber  
Herr Heubtman / Viel haltens

dafür / vnd befindet sich auch wol im werck / das  
ein jeglich Land seinen Landteuffel / ein jegliche  
Stad irē Stadteuffel / ein jeglich Dorff sein Dorff  
teuffel / ein jeglicher Herrnhoff seinen Hoffteuffel /  
ein jeglich haus seinen Hausteuffel / Ja auch wol  
ein jeglicher Stand / ein jeglich Mensch seinen ei-  
gen Teuffel hab / der sie zu sünden reizet vnd plä-  
get / wie man sihet / das ein Land / eine Stad / ein  
Haus / ein Mensch / mit irgend einem Lastet son-  
derlich mehr angefochten wird / denn andere.

Also hat Deudtschland vor andern Lendern /  
sonderlich je vnd je den Sauffteuffel gehabt / der  
vns Deudtschen tag vnd nacht zum Sauffen treib-  
bet / vnd vns keine ruge lest / wir sind deñ vol vnd  
toll.

A ij Wie

## Vorrede.

Wie aber das Sauffen so ein grosse Sünde sey / gienbet niemand / denn nur die rechtschaffnen Christen / Die andern aber hat der Sauffteuffel so gar gezaubert / das sie es für keine sünde vñd vnchristlich laster / sondern vor eitel tugent halten / Vñd / Wie der Prophet Jesai. am 3. Capit. sagt / Ir wesen hat sie kein heel / vñd rhümen ire sünde / wie die zu Sodom / vñ verbergen sie nicht / Wehe irer Seelen ( spricht er ) denn damit bringen sie sich in alles vnglück.

Wie thete man aber / das dem Teufel gesteuert vñd geweret würde ? Anders kan man nicht thun / denn das jm ein jeder Mensch vor sein person widerstehe mit dem schwert des Geistes / mit Gottes Wort / welchs da ist ein Krafft Gottes / Rom. 1. Vñd bete wider jnen im rechten starcken Glauben. Das sind die vornemesten waffen / vor welchen der Teuffel / so man getrost nachdringet / nicht bestehen mag. Darnach das die Prediger ernstlich dawider schreien vñd predigen / vñd jederman hierinnen ein gut Exempel geben. Die Oberherrn aber getrost die Gottsuerächter vñd Epicurische sew / die Seuffer / straffen / vñd dz sauffen auch selbst meidē / Die Eltern auch ire Kinder vñd Gesinde dauon abweisen / vñd sie auch selbs damit nicht ergern. Wo solchs also geschehe / ist kein zweifel dran / der Sauffteuffel würde sich aus Deutschland trolen müssen / oder würde ja an seinem Regiment gehindert / vñd also des sauffens weniger werden.

Wie

## Vorrede.

Wiewol aber auch viel fromer / gelehrter / Chri-  
stlicher Prediger vnd andere / oft viel feiner war-  
nung wider das Sauffen gethan vñ geschrieben /  
sich also wider diesen gewlichen Teuffel gelegt /  
auch bey etlichen nutz geschafft haben / sihet man  
doch gleichwol / das es der meiste teil gar nicht  
achtet / vnd (wie die Welt pfelet) alle trewe war-  
nung in Wind schlegt / Auch wie Gott gleichwol  
vmb verachtung willen seins Worts / vñd von  
wegen dieses vnd anderer laster in Suedschlande  
schon angefangen hat zu straffen / vñ fürwar noch  
eine grausame straffe / wo man sich nicht bessert /  
zu besorgen ist.

Auff das aber doch noch etliche mehr dē Sauff-  
teuffel abgeschlagen würden (weil Gottes Wort  
nimmer gar leer abgehet / wie Gott verheischt /  
Jesai. 55. vnd Gott auch wol zu weilen / durch ei-  
nen geringen / einfeltigen Menschen / dem Teuf-  
fel zu grösserm verdries / viel nutz schafft) vñd  
damit ja niemand keine entschuldigung vorwen-  
den könne / Hab ich zum vberflus mich vnterstan-  
den / meinen vnterricht vom Sauffen / welchen  
ich aus Gottes Wort / vnd teglicher erfahrung ge-  
fasset / auff's einfeltigst darzu zu thun / vnd also ei-  
nem jedern (so ers anders vor gut annemen wil)  
das schwert wider den Sauffteuffel / in die faust  
zu geben / mit welchem er jm widerstehen / jm ver-  
jagen / vnd das feld behalten müge.

Solchen vnterricht aber hab ich vnter E. G.

A iij

Namen

Vorrede

Namen ausgehen lassen / Erstlich / der Ursachen  
halben / das ich selbs erfahren vñ gemerckt / wie jr  
als ein Christlicher Herr / solchem laster auch son-  
derlich feind seid / Darnach / das mir von E. G.  
sehr viel wolthat widerfahren ist / Bitte E. G. wol-  
le solches in allem guten von mir erkennen vnd an-  
nehmen.

Gott der Vater vnsers HErrn Ihesu Chris-  
sti / vñ vnsrer aller / lasse jm E. G. sampt E. G. Tu-  
gentsamen Hausehren / meiner freundlichen lieb-  
ben Genattern / vnd beider lieben Kindlin befoh-  
len sein / Der wolle E. G. sampt allen den jren / in  
reinem erkenntnis vnd bekentnis seins heiligen  
Worts vnd Namens / bis ans ende erhalten /  
vmb seines lieben Sonts Ihesu Christi willen /  
AMEN.

Datum zu Görenz / Am tage des heili-  
gen Apostels Thomæ / An

no 1551.

E. G.

Williger

Matthæus Friderich  
Pfarher zu Gö-  
renz.

Etliche wichtige vrsachen / Darumb alle Menschen  
sich vorm Sauffen hüten  
sollen.

Die Erste vrsache.

Die erste vrsache ist / das das Sauffen von  
Gott in seinem Wort verboten ist.

Sauffen aber heisst ( wie es alle vernünfftige  
Menschen verstehen ) wenn man mehr in Leib  
genusst / denn die notturfft foddert / Es geschehe  
nun / auff wasserley weise / oder vmb wasserley  
vrsachen willen es geschehe / man thue es gleich  
aus eignem vornemen / aus gewonheit / oder je-  
mand zugefallen / so heisst doch alles gesoffen.  
Gleich wie Fressen / heisst / wenn man mehr speise  
in Leib stecket / denn die notturfft foddert. Denn  
essen vnd trincken ist vns von Gott darumb ge-  
geben / das wir den Hunger vnd Durst damit  
vertreiben / vnd den Leib damit erhalten sollen /  
Was nun darüber geschicht / das heisst alles ge-  
fressen vnd gesoffen / vnd ist ein misbranch  
der Creaturn Gottes / da hilfft keine entschuldigung  
fur.

Das es aber von Gott in seinem Wort verboten  
sey / ist offenbar / Denn Ephes. 5. saget Gott der  
heilts

chen  
wie jr  
son  
G.  
wol  
d an

hri  
5. Tu  
a lie  
foha  
n / in  
igen  
ten /  
len /

erich  
Gö  
eng.

## Wider den

heilige Geist/durch S. Paulum/auffs deutlichste  
also/Nolite inebriari uino, Sauffet euch nicht vol  
Weins/daraus ein vnordig wesen folget.

In sprüchen Salomonis 23. Cap. Sey nicht  
vnter den Seuffern vnd Schlemmern.

Luc. 21. spricht Christus auch / Hütet euch/  
das ewer hertzen nicht beschweret werden mit  
fressen vnd Sauffen.

Das sind ja deutliche befelh Gottes/darinnen  
er allen Menschen das Sauffen verbent.

Tu solt es ja billich sein/dz wir alle Gott hier  
innen gehorsam leisten/weil es sein wille vnd ge-  
bot ist/das wir vns furm Sauffen hüten sollen/  
Vnd wenn wir gleich kein ander vrsache hetten/  
vns dafür zu hüten / so solt vns doch billich dis  
allein vrsach gnug sein/das es Gott verbotē hat.

Senn dencke jm doch nach. Wer ist Gott?  
Vnd wer sind wir? Ist er nicht der Schöpffer al-  
ler Creaturn/der Herr Himels vnd der Erden/  
vor dem sich alles bücken vnd biegen muss / vor  
welchem auch die Teuffel aus der Hellen zittern/  
vnd sich fürchten / Der weit weit vber alles ist/  
vnd alles in seiner hand hat?

Wer sind wir aber? Sind wir nicht seine ar-  
men Elenden Creaturn von jm geschaffen/bisher  
von jm erneret vnd erhalten/von jm durch seinen  
einigen Son erlöset/vnd thewr erkauft/die wir  
on jm nicht ein Augenblick odem holen vnd leben  
können?

Solte



## Sauffrenffel.

Solte es nun nicht billich sein / in als vnserm Schöpffer / Erlöser / HErrn vnd Vatern gehorsam zu sein / da er gebent vnd spricht / Sauffet euch nicht voll : Das mus je alle vernunfft bekennen vnd sagen / das es billich sey.

Wir armen / Elenden / sterblichen Madsecke / die wir gegen Gott nicht wol einer fliegen / oder Lymfen zuuergleichen sein / Wollē das alles was wir sagen / von jederman geehrt / angenommen / geglenbet / gefürcht vnd gehalten werden sol / Wir wollen schlecht / das alles was wir vnsern vnterthanen / gesunden vnd künden sagen / das sol stracks / on alle einrede (wie denn billich) gehalten werden / Wo nicht / so stehet kein stecken recht / wir können auch Gottes wort / wie es denn auch billich) dazu einfüren.

Solte nun nicht viel billicher / Gottes gebot / von vns armen Menschen angenomē / geehrt / gefürcht / vnd gehalten werden : Solten wir armen Menschen nicht billich / wenn wir hören / was Gott vnser aller HERR von vns haben wolte / vnser hütlin abthun / vnd bald drauff sagen / oder gedenden / Ja lieber HErr / das wil ich gern thū / hilff mir nur durch deinen heiligen Geist dazu / Ich thue es billich / deñ du bist mein Schöpffer / Ich bin dein arme Creatur / Du bist mein HErr / Ich dein vnwürdiger diener / Du bist mein Vater / Ich dein armes Kind / bis mir allein gnedig / vmb deins lieben Sons Ihesu Christi willen / Amen.

B

Ach

## Wider den

Ach / wie wollē doch nur immermehr die Ober-  
herrn / Eltern / Hausherrn vnd hausfrawen / am  
Jüngsten gerichtē bestehen? Das sie (wie billich)  
von iren vnterthanen / Kindern vnd gesinden  
den gehorsam stracks gefoddert haben / vnd sind  
daneben selbs Gott irem H<sup>er</sup>ren so vngehorsam  
gewesen / haben sein gebot nicht geachtet / vñ mit  
füssen getretten / Gleich als wer Gott ein halber  
Narr / des gebot nicht zu hoch zu achten sey / als  
ires. Wie wollen sie doch immermehr bestehen?

Derhalben wil ich jederman hiemit auff's treu-  
lichst gewarnet vnd gebeten haben / Weil Gott  
das Sauffen verboten hat / das ers Gott zu eh-  
ren vnd zu gefallen vnterlassen wölle.

## Die Ander vrsache.

Die Ander vrsache / darumb alle Menschen  
das Sauffen meiden sollen / ist / das Gott drewet  
die Seuffer hie zeitlich vnd dort ewiglich zu  
straffen.

Senn im Jesaia am 5. Cap. drewet Gott also /  
vnd spricht / Weh denen / die des morgens früe  
auff sind / des Sauffens sich zu vleisigē / vñ sitzen  
bis in die nacht / das sie der Wein erhizigt / vnd  
haben harpffen / psalter / paucken / pfeiffen / vnd  
Wein in irem wolleben / etc.

folget von der straffe.

Darumb spricht er / wird mein Volck müssen  
weggeführt werden vnersehens / vnd werden sei-  
ne herr-

## Sauffrenffel.

ne herrlichen hunger leiden / vnd sein pöbel durst  
leiden. Das ist / Gott wil Seufferey / mit krieg/  
hunger vñ durst straffen. Solchs mercke wol. Das  
sol die zeitliche straffe sein / folget nun auch die  
ewige. Den so spricht er weiter / Daher hat die hel  
le die Seele weit auffgesperrt / vñ den rachen auff  
gethan / on alle masse / das hinunter faren / beide  
ire herrlichen vñ pöbel / beide ire reichen vnd frö  
lichen. Das ist / Gott wil Seufferey mit der hellen  
vnd ewigem feur straffen. Das mercke auch / vñnd  
vergifs es nicht.

In diesem fünfften Cap. spricht er hernacher  
abermals / Wehe denen / so Helden sind Wein zu  
sauffen / vñnd Krieger in füllerey. Dieser Spruch  
reimet sich sehr wol auff vnser zeit / da ein jeglicher  
seine Wanheit mit Sauffē beweisen / Ritter wer  
den / vñnd das feld behalten wil / da ein jeglicher  
für dem andern im sauffen gelobet werden wil.

Wie gefelt aber solches vnserm H. Ern Got  
te? Es gefelt jm also / das er alhie wehe vñnd ach  
vber solche schreiet. Du must aber wissen / wo  
Gott wehe vber die sünden spricht / das er nicht  
nur ein zeitliches wehe / da einem hie zeitlich et  
was wehe thū solle / meiner / sondern beides / das  
zeitliche vnd ewige wehe / das ewige / vnbegreiff  
liche / vnansforschliche hertzleid. Solchs dreuet  
Gott alhie den Seuffern / ein solchs Benedicite  
gehört vber solch sauffen / vnd kein anders / da be  
hüt vns Gott für / Amen.

B ij In

## Wider den

In der ersten Epistel zum Corinthern am 6. Cap. sagt Gott durch S. Paulum / Lasse euch nicht verführen / weder die Hurer / noch die Abgötischen / noch die Ehebrecher / noch die Weichlingen / noch die Knabenschender / noch die Diebe / noch die Heizigen / noch die Trunckenbold / noch die Lesterer / noch die Renber / werden das Reich Gottes ererben. Das ist je deudtlich geredt / das kein Trunckenbold / das Reich Gottes ererben / das ist / ins Himmelreich / ins ewige leben / komen werde.

Zum Galat. am 5. Cap. Offenbar sind die werck des fleisches / als da sind / Ehebruch / Hurerey / 2c. Sauffen / Fressen / vnd dergleichen / Von welchen ich euch hab zuvor gesagt / vnd sage noch zuvor / das die solches thun / werden das Reich Gottes nicht erben.

Also siehestu nun / wie Gott das Sauffen nicht allein verbent / sondern auch darneben drewet / solchs hie zeitlich vnd dort ewiglich zu straffen.

Hierzu nim nun auch die drewort im andern Buch Mosi / am 20. Da Gott daher donnert vnd spricht / Ich der HErr dein Gott / bin ein eueriger Gott / der vber die / so mich hassen / die sünde der Väter heimfücht an den Kindern / bis ins dritte vnd vierde glied. Siehe da / Alhie drewet Gott das Sauffen vnd ander sünde / nicht allein an dir / sondern auch an deinen Kindern vnd Kindskindern / bis ins dritte vnd vierde glied zu straffen /

## Sauffreuffel.

straffen. Wiltu nun dich deiner selbst nicht erbarmen / so las dich doch deine arme Kinder vnd Kindskinder erbarmen / vñ las das Sauffen vnterwegen / Wo nicht / so versihe dich künlich des / was dir von Gott gedrewet wird / Den Gott wird deiner halben nicht zum Lügner werden.

Also folget nun / das alle Menschen bey vermeidung zeitlicher vnd ewiger straffe / bey verlust leibs vnd seel / bey verlust ewiger seligkeit / sich vorm Sauffen zu hüten schuldig sein.

## Die Dritte vrsache.

Die dritte vrsache ist / das wir keine stunde noch augenblick vorm Tod sicher sein.

Denn das ist ja gewis / das vnser keiner gewis ist / wenn / wie vnd wo er sterben sol. Vnser keiner weis / ob er heute oder morgen / diese stunde / oder diesen augenblick vom tode vberfallen möcht werden. Vnser keiner kan mit warheit sagen / Ich weis es vor war / das ich heute oder diese stunde vberleben werde. Der Tod schleicht vns allezeit / vñ an allē endē auff der ferschen nach / Wie auch das gemeine prichwort lauter / Es ist nichts gewissers / denn der Tod / Aber nichts vngewissers / denn die stunde des todes. Darumb warnet vns auch Christus vnser lieber HErr / vnd spricht / Seid wacker allezeit / vnd betet / den jr wisset weder tag noch stunde / etc.

Wenn du nun truncken werest / vnd würdest

B ij vom

## Wider den

vom Tode vberasselt / kanstu wol gedenccken / wie  
dircs gehen / vnd wo du hinfaren würdest. Denn  
du hast gehört / das kein Trunckenbold ( wie S.  
Paulus saget ) werde ins Himmelreich komen. Wo  
werden sie denn hinkomen? Nirgendt hin / denn  
ins ewige hellische fewr. In solches bad / gehörn  
solche few. Dem Teufel haben sie gedienet / vnd  
im zugefallen sich volgesoffen / der wird auch iuen  
endlich lohnen.

Du möchst aber vielleicht gedenccken / du wol-  
test Gott in der vollen weise vmb vergebung bit-  
ten / vnd hoffen / er werde dir gnedig sein. Ant-  
wort. Ja / wenn du nur auch als denn von hertzen  
köntest beten / vnd hoffen. Wie aber wenn du dich  
nicht besinnen könntest? Oder / wenn du dich gleich  
besünnest / wie wenns nicht von hertzen / mit ern-  
ster andacht gehen könnte? Wie wenn dir der Teuf-  
fel widerstehen würde ( wie ers on zweiffel thun /  
vnd sein bestes ersehen würde ) vñ dir deine sünde  
vorhielte / dich also engstete / das du dich gegen im  
mit Gottes Wort vnd gebete weren soltest? wo  
woltestu als denn bleiben? was woltestu machen?  
Ein nüchtern Mensch hat alda gnug zu schaffen /  
der bey guter vernunft ist / Geschweig denn ein  
Trunckener.

Ja höre / wie wenn du plötzliche vmbkernest /  
vnd Gott / des wort vñ gebot du verachtet hast /  
dem Teufel dem du gedienet / ober dich verhin-  
ge / das er dich im schlaff erwürgete / dich ersti-  
ckte /

## Sauffrenffel.

ette / oder dir den hals breche / wie newlich den  
fünffen in der Schlesing / Oder schürte zu / das du  
in trunckner weise plözlich erstochen / oder erha  
wen würdest / oder dich etwa zu tod fielest / wie sol  
che felle sich offte zutragen / vnd erfahren werden.

Darumb warnet vns Sanct Peter nicht vmb  
sonst / in der erstē Epistel am 5. Cap. da er spricht /  
Seid nüchtern vnd wacher / denn ewer Wider  
sacher der Teufel gehet umbher / wie ein bröllen  
der Lowe / vnd sucht / welchen er verschlinge.

So folget nun hieraus auch / dz sich alle Men  
schen billich solcher grossen fahr halben / inē selbs  
zum besten / vorm Sauffen hüten sollen / weil wir  
keine stunde noch augēblick vorm Tode sicher sein /  
vnd wol bedürffen / das wir immertzu nüchtern er  
funden werden. Vnd solte ein jeglicher Mensch  
allezeit sein rechnung also machen / vnd gedencē /  
Wie wenn du heute diesen tag / oder heinte diese  
nacht / oder diese stunde sterben soltest / Würdestu  
auch also vnd also thun? Würdestu auch dich  
vol sauffen / vnd so freuentlich wider Gott han  
deln?

## Die Vierde vrsache.

Die Vierde vrsache / darumb alle Menschen  
sich vorm Sauffen hüten solten / ist / das wir alle  
stunden des Jüngsten tages gewarten müssen.

Denn da Christus von den zeichen des Jüng  
sten tages redet / spricht er / Wenn jr sehet / das  
solchs

## Wider den

solchs anfehet zu geschehen / So wisset / das ewer  
erlösung / das ist der Jüngste tag nahe ist.

Nu haben solche zeichen nicht allein angefan-  
gen zu geschehen / Sondern sind der mehrerteil  
schon ergangen / vnd sonderlich in wenig jaren da-  
her offte vnd heuffig gesehen worden.

Aus welchem erfolget / das der Jüngste tag  
sehr nahe / vnd für der thür sein mus / Das wir  
nun mehr nicht wissen können / ob er villeicht dis  
jar / diesen Monat / diese woche / oder heute diesen  
tag komen möchte. Wir Christen wissens gewis /  
das er nahe ist / vnd plötzlich / ehe sichs die Men-  
schen versehen werden / komen wird.

Derhalben warnet Christus seine Christen  
auch / Luc. 21. vnd spricht / Hütet euch / das ewer  
herzen nicht beschweret werden mit Fressen vnd  
Sauffen / vnd mit sorge der narüg / vnd kome die-  
ser tag schnelle vber euch / Denn wie ein fallstrick  
wird er komen / vber alle die auff Erden wonen.

Christus nimpt ein Gleichnis von den Vogel  
auff ein Vogelherde / dieselben sind niemals siche-  
rer gewesen / gehen vnd hüpfen hin vñ her / ster-  
zen die schwentze / vnd sind sehr frölich / Haltens  
dafür / als haben sie bey läger weile nicht also wol  
gelebt / Schwip / in ein huy / ligt das Netze vber  
inen / vnd sind arme gefangene Vogel. Also sagt  
Christus / wird dieser tag auch schnelle komen /  
vber alle die auff Erden wonen.

So solten nu alle Menschen abermal billich  
in



## Sauffrenffels

in sorgen leben / sich vorm Sauffen hüten / vnd alle stunden gedencen / Wie wenn heute der Jüngste tag keme: Also würden sie das Sauffen vnd ander laster wol vnterwegen lassen / vnd fro werdē / das sie nüchtern blieben.

## Die Fünffte vrsache.

Die fünffte vrsache das Sauffen zu meidē / ist / das es ein Menschen zum vnerstendigen Narren macht.

Wie S. Augustinus spricht / Ebrietas aufert memoriam, dissipat sensus, confundit intellectum, etc. Trunckenheit nimpt hinweg das gedechtnis / zerriert die sinnen / verwirret den vorstand. Also auch Origenes / spricht / Ebrietas facit de homine bestiam: de robusto, infirmum: de prudente, fatuum. Trunckenheit macht aus ein Menschen / eine Bestien / Aus ein starcken / einen schwachen / Aus einem vorsichtigen / einen Narren.

Solchs bekräftiget auch die heilige Schrift / Als in Sprüchen Salomonis am 20. Cap. Der Wein macht lose Leute / vnd starck getrencke macht wilde / Wer dazu lust hat / wird nimmer weise.

Offen 4. Hurerey / Wein vnd Most machen toll. Jesus Syrach am 32. Die Trunckenheit macht einen tollen Narren noch töller. Item am 19. Wein vnd Weiber bethören die Weisen.

Sis leret auch die tegliche erfahrung / Denn mancher kömpt durch sein Sauffen vmb seinen fei-

C

nen

## Wider den

nen verstand / welchen im Gott vor andern vorli-  
hen hat / das er ganz zum Narren wird. Mancher  
kômpt drüber vmb sein gedechtnis / das er weder  
im selbs noch andern nütze sein kan. Vnd ich zweif-  
fel nicht / wenn wir Sündschon das Fressen vnd  
Sauffen lieffen / wir soltens mit verstande vnd  
witz vielen andern Nation zunor thun. Wie wir  
sehen / das viel feiner wunderlicher Ingenia vn-  
ter vns (auch in solchem vnmesigem wesen / durch  
welchs alles geschwecht wird ) gefunden werden.

Weil nu dem also / so solten billich abermals al-  
le Menschen ursache draus nemen / sich hinfurt  
fur dem Teufflischen / schendlichen vñ schedlichen  
laster / dem Sauffen zu hüten.

## Die Sechste ursache.

Die Sechste ursache sol sein / das Trunckenheit  
ein ursache ist zu allerley sünden.

Wie Origenes spricht / Ebrietas est mater omni-  
um vitiorum, Trunckenheit ist eine mutter aller la-  
ster / das ist / sie gebiert alle laster.

Solchs bezeuget auch S. Paulus / zum Ephe-  
sern am 5. Cap. da er spricht / Sauffet euch nicht  
vol weins / daraus ein vnordig wesen folget.

Das solchs war sey / Sihestu auch in teglicher  
erfarung / Denn wer truncken ist / der fraget / wes-  
der nach Gott / weder nach den Menschen / Da  
müssen alle flüche vnd schwür heraus / da flucht  
mancher auff's greulichste / der es sonst / wenn er  
nüchtere

## Sauffrenffel.

nüchtern ist / nicht pfeget. Da wird die Predigt  
vnd Gottes Wort verachtet / vñ spöttisch dauon  
geredt / Spricht jemand / Ich lieber thu dis vnd  
das nicht / denn man höret in der predigt / das es  
sünde ist / Bald feret ein Trunckenbold heraus /  
Was hab ich feyls am Pfaffen / er mag reden was  
er wil / so thu ich was ich wil / was hat er mir zuge  
bieten / ich wils thun / vnd wil den schand Pfaffen  
nicht ansehen.

Da wird Vater vnd Mutter / Herr vñ Fraw /  
Richter vnd Oberherrn verachtet. Saget man /  
dein Vater kompt / oder der Richter kompt. Bald  
höret man / Was hab ich feyls am Vater / dem al  
ten / etc. Was frag ich nach dem Richter / Lass in  
immer komen / Trotz / das er mich angreiffe / er sol  
wol sehen / das ich auch feuste habe. Ja ein Trun  
ckenbold sol wol wenn er heim kompt / Vater  
vnd Mutter schlagen / wo sie ihn jrgend straf  
fen wolten. In summa / da ist weder ehr noch tu  
gend.

Item / Ein Trunckenen ist niemand gut gnug /  
da ist im einer wie der ander / Der freund ebē so lieb  
als sein feind. Da höret man ein grewlich schmehe  
vñ lestern / einer schilt den andern ein schelm / die  
ser wils nicht leiden / schmehet in wider / da hebt  
sich als denn ein solchs erschrecklich fluchen vnd  
wünschen / das sich die Sonne dafür entferben  
möchte / diesen sol dis vnd ihens schenden / den  
andern ein anders / Bis es entlich zum schlagen /

C ij reus

## Wider den

renffen vnnnd würgen kompt / das mancher seinen guten freund / welchen er vorhin auff den henden tragen wolte / erwürget.

Item / da höret man wenig züchtiger wort / viel vnzüchtiger / schandbarer wort vnd zoten gehen alda / welche zu Hurerey vnd vnzucht vrsache geben. Da betreuget manchen der Teuffel / das er die Ehe bricht / oder ander vnzucht vbet / welchen er sonst sein lebtage nicht dazu hette bereden mögen.

Item / da stiel mancher dem andern / welches er sonst nicht thete. Item / da geschicht viel Nachrede / aufsecken vnd zur bandhawen / derer / die nicht vorhanden sein / da mus jederman herhalten.

In summa / Quid non Ebrietas designat? Was darff ein Trunckenbold nicht thun? Ich wolte gerne ein laster hören / das nicht aus Trunckenheit zu folgen pflegete / ob sie schon nicht alle auff einmal bey etlichen Seuffern folgen.

Wie gehet aber solches zu? Das wil ich dir sagen. Es ist kein laster / durch welches ein Mensch seiner sinnen vnnnd vernunft also beraubet wird / als dis. Wenn nun die vernunft geschwecht vnd hin ist / so haben als denn die Teuffel gut machen / denn der Mensch kan sich irer nicht erweren / vnd jnen widerstand thun. Tu ist kein Teuffel allein / wo einer ist / da sind jr viel bey jm / Wie im Euangelio zu sehen ist / das ein ganze Legion / das ist bey

## Sauffteuffel.

bey 6000. Teuffel / ein einigen Menschen eingewomen hatten / Wie Christus auch anzeiget / das sie trewlich bey einander halten / vnd gut einig sind / wie wir zwar auch sehen / das es pfleget zu zugehen / wenn ein Mensch ein Lasterteuffel verhenget / das ist / in ein laster williget / das es nicht das bey bleibet / jr folgen mehr.

So ist kein Lasterteuffel / vmb welchen die andern so gern sein / als der Sauffteuffel. Ursache ist die / das er die Leute fein bethören / vnd ihrer vernunft berauben kan / so haben sie als denn gute sache.

Wenn nun der Sauffteuffel ein Menschen einnimpt / so sind die andern Lasterteuffel auch nicht weit von jm / Als da sind / der Hoffartsteuffel / Zornsteuffel / Lastersteuffel / Fluchsteuffel / Crauwsteuffel / Neidsteuffel / Hasssteuffel / Mordsteuffel / Hohnteuffel / Schmachsteuffel / Schandsteuffel / Hurnteuffel / Geitzsteuffel / Diebsteuffel / Wuchersteuffel / Fraststeuffel / Spielsteuffel / Haderteuffel / Lügentsteuffel / vnd dergleichen. Diese alle legen hand zu werck / bey ein truncken Menschen / bis sie in in jamer vnd not bringen / vnd gereth in offte alda die schanze / das sie das bey jm ausrichten / welchs sie sonst nicht vermögen.

Des wil ich etliche Exempel erzelen / Da der Sauffteuffel den fromen heiligen Man vnd Prediger der Gerechtigkeit / den Noah bethöret / vñ ehe er sichs vorsah / zu fall brachte / Wie wird

C iij      er seis

## Wider den

er seiner so höhnlich in die faust gelacht habē / Aber da warē die andern freilich auch nicht weit / vñ weils inen von Gott nicht zugelassen ward / das sie alle schaffen konten / versuchē sich doch am meisten diese drey / Nämlich / der Schandteuffel / Hohn- teuffel vnd Schmachteuffel. Der Schandteuffel thert im diese schande an / er brachte zu wegen / dz er schēdtlich auffgedeckt lag. Die andern zween / weil sie nicht mehr konten / richteten sie den jüng- sten Son an / den vnartigen Cham / das er den Vater verhōnet vnd schmehet. Das war dem lie- ben Sōnin / dem bösen Buben / vberaus wolge- fellig / das es der Vater auch ein mal versehē hat- te / Wia / sehet da / wenn ich solchs thert / Ich mein ja / ich müste mich leiden / Ich mein ja / ich würde es ein weil vom Vater hören müssen / drum b kants im nicht auch feilen.

Hernacher da der Sauffteuffel den fromen hei- ligen Man Loth auch durch seine tōchter zu fall- brachte / war bald der Hurnteuffel vorhanden / vnd richtet bey im aus / das er vorhin bey dem hei- ligen Manne nicht ansrichten hett können.

Solche Exempel sind vns zur warnung vorge- schriebē / drum lerne an den heiligen Mennern / vñd hūte dich. Ist solches an inen geschehen / was solte wol mit dir werden / wo du dem Sauff- teuffel verhingest ? Gehet dirs einmal wol hin- aus / Es möchte das andermal nicht also Lehr ab- gehen.

Der

### Sauffreuffel.

Der feine Mensch König Alexāder Magnus/  
durch welchen Gott viel gewundert hat / vō wel-  
chem er auch durch den Propheten Daniel grosse  
ding propheceiet hat / der die ganze welt in weni-  
ger zeit / nemlich in zwelff jaren / fast alle jm vnter-  
thenig machte / welchen niemand / wie mechtig vñ  
gewaltig er war / widerstehen konte / vor dem sich  
alles fürchtet vñd zitterte / der hatte viel feiner  
tugent vñd gaben Gottes vor andern Menschen.

Des höre ein Exempel.

Saer noch jung wider den König der Persen  
Darium kriegete / ward der König Darius zorn-  
ig / vñd sandte jm drey geschenke / Ein Rute /  
ein Ballen / vñd ein stück Gold / Die Rute solt  
bedeuten / das er noch ein Kind wer / vñd be-  
dürffte wol / das er sich noch ein weil mit der Ru-  
te steupen liesse / Der Ball / das jm besser zime-  
te / vñd er besser geschickt wer / mit dem Bal-  
len zu spielen / denn mit kriegem vmbgehen / Das  
Gold / das er zu geringes vermögens wehr / wider  
ihn zu streiten / vñd bedürffte wol / das man jm  
gebe. Aber Alexander nam die geschenke gut-  
willig auff / vñd schreib dem Könige Dario wis-  
der / Die rute neme ich an / als die du mir vberge-  
ben hast / das ich dich straffen / vñd dich vñd  
dein Volck mir vnterthan machen sol / Den  
Ball / als der die runde kugel deins Königreichs  
bedeuter / das du mir damit dein Reich vberge-  
ben habest / welches ich alles in meine gewalt  
vber-

## Wider den

vberkomen sol / das stücke Gold / als der ich ein Herr deins Reichthums werden sol / des du mir schon ein teil vbergeben hast. In solchem allen hat er nicht gelogen / denn es ist alles also ergangen.

Dieser feiner Mensch Alexander Magnus / da er den Sauffteuffel bey jm einlies / das er ins sauffen vnd schlemmen geriet / war es bald mit jm aus / da fand sich der Hoffartsteuffel / Hurnteuffel / Zornsteuffel / Meidsteuffel / vnd viel ander Laftersteuffel / vnd ward gar ein Wust aus jm.

Er gab sich vor einen Gott aus / vnd gebot / man solt in vor ein Gott halten vnd annemen / Wiewol er solches herrischen vorgebēs selbs auff eine zeit lachen vnd bekennen musste / das es nichts wer / da er mit ein pfeil verwundet / blutrünstig ward / fragte er seine freunde / Ob auch die Götter blüeten.

Item / Er erwürgete seine besten freunde beim wein / Allein darumb / das sie jm seinen Vater lobeten / den er wolte es alles allein sein. Aber Gott straffte in auch / das er kein glück mehr hatte / vnd ein elend ende nam.

Solcher Exempel findet man viel in den Historien / alhie one not zu erzelen. Vergifs auch nicht des Exempels der fünff vollen Brüder in der Schlesig / newlich zu vnsern zeiten geschehen. Denn Gott hats gewislich vns allen zum sonderlichen Beispiel geschehen lassen.

Ich



## Sauffteuffel.

Ich wil noch eins erzelen. Man lieffet danon/  
das der Teuffel eins mals einem Menschen tag  
vnd nacht keine ruge hat lassen wollen. Vnd da er  
ihn gefraget / was er doch von jm begere? Soler  
geantwort haben / Er wolle jm keine ruge lassen /  
Er willige denn vnter dreien sünden eine zu bege-  
hen / fraget er / Was es denn vor sünden weren?  
Da antwort er / Er solle entweder seinem Nach-  
barn beim Weibe schlaffen / oder solle ihn / den  
Nachbarn) erwürgen / Oder wo er der eins nicht  
thun wolte / soler sich jm zugefallen / ein mal voll  
sauffen. Da soler keins haben willigen wollē. Als  
aber der Teuffel ihm gar keine ruge lassen wil/  
williget er endlich / Sich ein mal voll zu sauffen /  
Als das es nicht so ein grosse sünde wer (wie er  
meinete) als die andern zwo.

Da er sich nu vollgesoffen / vnd seiner ver-  
nunfft gleich beraubet war / Bald sind der Hurn-  
teuffel vnd Nordteuffel vorhanden / vnd legen  
hand zu werck / betriegen den armen Menschen /  
geben ihm ein / das ihm einfelt in trunckener wei-  
se / vnd gedencet / Sihe da / was hastu ge-  
than /? Du hast dich dem Teuffel zugefallen voll  
gesoffen / Was hastu nun danon? Du hettest  
gleich so mehr gewilliget / bey des Nachbarn Wei-  
be zuschlaffen / So hettestu doch freud vnd lust  
danon gehabt / Ich habs doch schon zu viel gewa-  
get / vñ dem Teuffel zu gefallen mich voll gesoffen /  
damit wider Gott gesündiget / solich nun von  
S Gott

## Wider den

Gott gestrafft werden / so verdiene ichs eben so  
mehr wol.

In des malet jm der Hurnteuffel in trunckner  
weile des Nachbarn Weib für / wie sie so schön so  
freundtlich sey. Darauff gehet er also trunckē hin /  
vberredet sie / vñ schlefft bey jr. In des kompt ihr  
Man / der Nachbar zu massen / vnd wils rechen /  
Aber dieser stellet sich zur wehr / vnd erwürget sei  
nen Nachbar. Beging also drey sünden eben auff  
eine zeit.

Sihe da / ist nicht dis ein recht Exempel: da  
bey man sihet / wie die Teuffel ein gewonnen spiel  
haben / wenn sich ein Mensch den Sauffteuffel  
narren vnd betriegen lest. Der Hurnteuffel vnd  
Wortteuffel konten bey diesem Menschen nichts  
ansrichten / Der Sauffteuffel aber bringets meiß  
sterlich zu wegen / damit / das er dem armen Men  
schen eingibt / Volsauffen sey nicht so grosse sün  
de / als andere / Vorkleinert also solchs laster / wie  
er (leider) izund bey vielen thut / das es viel vor  
kein laster noch sünde / sondern vor eitel tugent  
halten.

Was solte aber der arme Mensch / weil jm der  
Teuffel keine ruge lassen wil / gethan haben / Er  
solte ihm in ein starcken vortrawen vnd Glau  
ben zu Gott mit Gottes Wört widerstanden ha  
ben / vnd gesagt / Mein Teuffel / Es stehet ge  
schrieben / Du solt nicht Ehebrechen. Item / Du  
solst nicht tödten. Item / Saufft euch nicht voll /  
vnd

## Sauffrenffel.

vnd solte drauff zu Gott vmb hülffe geschrien haben / vnd obs noch ein weile verzogen / solte er solchs Creuze mit gedult / Gott zugefallen / getragen / vnd mit geber vleissig angehalten / haben.

Also folget nun hieraus abermals / weil trunckheit vrsache gibt zu allerley sunden / lastern / vnd schanden / das alle Menschen sich billich solcher grossen fahr halben / vorm sauffen hüten sollen.

## Die Siebende vrsache.

Die siebende vrsache / vmb welcher willen alle Menschen sich vorm sauffen hüten sollen / ist / das das sauffen schaden bringet / an ehr / leib vnd gut.

An ehr / den dadurch kompt man zu ein bösen namen / vnd bey allen Eheliebenden Menschen / in verachtung / das niemand viel von jm helt. No (spricht man) er ist ein voller zapff / was sol er andere regieren / oder leren / weil er sich selbs nicht regieren vnd leren kan.

Saher kompts auch warhafftig / das die Pfar herr vnd Prediger also gar beim gemeinen Man in verachtung komen sein / nicht allein jr Person / sondern auch jr ampt vñ lehr / das jr viel so ein böse leben führen / mit sauffen / spielen / fluchen / vnvorschambter vnd leichtfertiger rede / vñ andern lastern.

S ij Vnd

## Wider den

Vnd ist's nicht ein grosse list des Teuffels? Ser  
Teuffel sihet/ das er das Göttliche Wort in die-  
sen Landen / mit aller macht nicht hindern kan/  
Harre (gedenckt er) kan ichs nicht hindern / das  
es nicht geprediget werde / so wil ichs doch hins-  
dern / das es nicht angenommen werde / Wie könnte  
ers aber auff eine füglichere weise thun / denn das  
er die Pfarherrn selbs vberredet / das sie anders  
leben / denn sie leren. Da stößt sich jederman dran.  
Denn wer wil gerne aus einem schlammigen ge-  
fesse trincken? wenn gleich der Wein noch eins so  
gut wer.

Was sol ich thun? spricht man / Ich sehe / das  
es der Pfaffe selbs thut / weil er sein leer nicht ach-  
tet / was sol ich jr den viel achten? wer es im ernst/  
so thete er selbs darnach. Sihe doch / Wie könnte  
dem Teuffel die schanze besser geraten? denn was  
sie mit irem predigen bawen / das reißen sie mit  
irem schendlichen leben wider danider / wo nicht  
zweimal mehr.

Wehe aber solchen Pfarherrn vnd Predi-  
gern / wie werden sie so schwere rechen schaft ge-  
ben müssen am jüngsten gericht / Nicht allein vor  
ire person / sondern auch vor alle die jenigen / wel-  
che sie mit irem sauffen vnd bösem leben geergert /  
vnd jnen ursache zu sünden gegeben haben. Ach  
wie wollen sie doch nur ewig bestehen? Luc. 12.  
spricht Christus / So der selbe Knecht in seim her-  
zen sagen wird / Mein Herr verzeucht zu komen /  
vnd

## Sauffteuffel.

vnd fehet an zu schlagen Knechte vnnnd Megde/  
auch zu essen vnd zu trincken/ vnd sich voll zu sauff-  
fen/ So wird des selben Knechts Herr komen an  
dem tage / da er sichs nicht versihet / vnnnd zu der  
stunde/ die er nicht weis/ vnnnd wird in zu scheit-  
tern/ vnd wird im sein lohn geben mit den vnglei-  
bigen.

Also ist's auch mit den Oberherrn vnnnd Re-  
genten/ Also auch mit Hausherrn vnd Hausvā-  
tern/ vnd mit ein jeglichen Menschen/ das sie (wo  
sie sich vol sauffē) deste weniger Autoritet bey den  
iren haben / vnnnd deste mehr in verachtung sein.  
Das es also war ist/ dz das sauffen ein Menschen  
schadet an seinen ehren.

Am leibe aber bringets schaden / deñ dadurch  
wird der ganze leib/ alle gliedmas/ alle adern/ ge-  
schwecht/ wie man in teglicher erfahrung sihet.

Ein Senffer hat die nacht keine ruge / er ligt  
vnd kröchst / im ist nicht wol / Schlefft er ein / so  
hat er erschreckliche trewme. Des morgens wenn  
er auffstehet (so er anders kã) befindet er sich noch  
beschweret / der kopff thut ihm wehe/ der ganze  
leib ist matt/ wie er zerschlagen wer/ Er hat zu kei-  
nem dinge kein lust/ weder zur arbeit / weder zum  
essen noch zum trinckē / er sitzt/ als wer er an kopff  
geschlagen. Da folget auch als denn der schwin-  
del / rote augen / mancherley flüsse / schnupffen/  
schnuder/ halsgeschwer/ brustgeschwer/ feule an-  
lunge vnnnd leber/ böser magen/ Colica/ heffmut-

S iij ter/

## Wider den

ter / Stranguria / Tuncelheit der augen / böse ge-  
dechnis / Taubheit / Lame der glieder / Zittern  
der hende / Zipperlin / der Schlag / fallēde sucht /  
der Krāpff / der Stein / Wassersucht / Gelsucht /  
Reude / vnd wer wils als erzelen ? Endlich folget  
vorkurzung des lebens / das er ehr der zeit ster-  
ben mus. Solchs müssen alle erfarnē Medici be-  
kennen.

Also lieset man auch im Plutarcho / vom vor-  
gedachten Alexandro Magno / wie er auff ein zeit  
ein güldene Kron hab auffgeworffen / dem der am  
meisten süsse. Also hab sie einer mit namen Pro-  
machus mit sauffen erworben / Hab aber nicht len-  
ger darnach gelebt denn drey tage.

So geschichts auch offte / dz mancher Seuffer  
drüber erwürget / oder ja verwundet wird. Man-  
cher fellet sich zu tode. Heist solchs noch nicht dem  
leibe geschadet / so weis ichs nicht.

Hieher gehören die sprüche der heiligē schrift /  
Als Salomon in seinen sprüchen am 23. Capitel.  
Wo ist wehe ? wo ist leid ? wo ist zand ? wo ist klā-  
gen ? wo sind wunden on vrsachen ? wo sind rote an-  
gen ? nemlich / wo man beim wein ligt / vnd kompt  
aus zusauffen was eingeschēckt ist / Sihe den wein  
nicht an / das er so roth ist / vnd im Glase so schön  
stehet / Er gehet glatt ein / aber darnach beißt er /  
wie ein Schlang / vnd sticht wie ein Ottern.

Jesus Syrach am 32. Cap. Sey nicht ein wein-  
senffer / denn der Wein bringet viel leute vmb /  
Der

## Sauffteuffel.

Der wein zur notturfft getruncken / erfrewet leib  
vnd seele / Aber so man sein zu viel trinckt / bringet  
er das herzeleid. Sie trunckenheit macht ein  
tollen Narren noch toller / das er trogt vñ pocht /  
bis er wol geblewt / geschlagen vñd verwundet  
wird.

Am gut bringet das sauffen schaden / denn das  
durch kompt man vmb das / was Gott bescheret.  
Gott bescheret manchem / das er sich / sein Weib  
vnd Kind dauon erneren / auch armen leuten ge-  
ben sol vnd künde. Er gehet aber hin / versuuffs /  
verschlemmets vnd verspielets. Dafür lest er sein  
armes Weib vnd Kind daheim hunger vñd not  
leidē. Da wirts ein mal heissen / Gib rechenschaft  
von deinem haushalten / wo hastu (wird Gott spre-  
chen) diesen gulden / groschen / pfennig / heller hin  
gethan? Hab ich dirs darumb geben / das du es  
versauffen / verspielen vñ vnnütz an werden solst?  
Oder / meinstu du habest macht gehabt / mit dem  
meinen / das ich dir vbergeben hab / zu handeln /  
wie du gewolt hast?

Solchs glauben wenig Leute / das sie werden  
dürffen rechenschaft geben / von dem / was sie ver-  
schlemmet vñ verspielet / oder sonst vnnütz durch-  
bracht haben / Obs wol Christus selbs saget / Ja /  
Warumb befiehlt Gott / wie wir seine güter recht  
gebrauchen sollen / wenn er nicht dauon rechen-  
schaft foddern wolte? Wenns aber dazu komen  
wird / so wird sie es gerewen / aber es wird zu lang  
geharret sein.

Offte

## Wider den

Offte begibt sichs auch / das mancher gelt bey sich hat / vñnd in trunckner weise verleuret. Auch geschichts offte / das das Weib durch des Mannes sauffen geergert / vñnd verursacht wird / das sie gedencet / kan er sauffen vñnd schwelgen / so mus ich trawen auch sehen / wo ich bleibe / Seufft der Mann an einem orte / so seufft sie an einem andern / Tregt er fornen aus / so tregt sie hindē aus.

Vber das alles kompts auch gemeiniglich / das wenn du gesoffen hast / vñnd auff den morgen davon vngeschickt bist / oder auch wol zu weilen etliche tage / so bleibet dein handwerck oder ampt an stehen. Also gehet als denn auch an deiner narung ab. Da du nun hettest ein groschen verdienen können / mustu also zu deinem schaden / noch zu dem / das du vnnützlich verzeret hast / mit vngesundem leibe / auch das selbige emperen.

Hieher gehörn die sprüche der heiligē schrift / Als Salomon spricht in seinen sprüchen am 10. Cap. Der Gerechte braucht seines guts zum leben / Aber der Gottlose braucht seins einkomens zur sündē. Item am 21. Cap. Wer gern in wollust lebet / wird mangeln / vñnd wer Wein vñnd öle liebet / wird nicht reich. Item am 23. Cap. Sey nicht vnter den Seuffern vñnd schlemmern / denn die seuffer vñnd schlemmer verarmen / vñnd ein schleffer mus zerrissen kleider tragē. Ihesus Syrach am 19. Cap. Sey nicht ein Prasser / vñnd gewehne dich nicht zum schlemmen / Zu <sup>ii</sup> das du nicht zum betler



## Sauffteuffel.

ler werdest / vñ weñ du nimmer gelt im seckel hast /  
auff wucher nemen müßest / Ein Erbter der sich  
gerne vol seufft / der wird nicht reich.

Weil nun dem also ist / das das sauffen ein  
Menschen an ehr / leib vnd gut schaden bringet /  
folget abermals vnwidersprechlich / das alle  
Menschen jnen selbs zum besten sich dafür hüten  
sollen.

## Beschlus.

Sieweil nun ( wie gehört ) das sauffen so ein  
grewlich / Teufflich / verdamlich / ja vnmensch-  
lich / viehisch vnd sewisch / fehrlich vnd schedlich  
laster ist / von Gott / bey vermeidung zeitlicher vñ  
ewiger straffe / verbotē / welchs dem Menschen an  
leib vnd seel / gut vnd ehr schaden zufüget / So  
wil ich hiemit zum beschlus / jederman auffs trew-  
lichst von Gottes wegen vermanet vñ gebeten  
haben / wer ihm wil lassen raten / das er solchs  
laster / als den Tod vñ Teuffel / als eitel gift /  
Gott zu ehren vnd zu gefallen / vnd jm selbs zum  
besten / fliehen vnd meiden wolle.

Wo es auch jemand bissher geübet hette / der  
wolle jm lassen raten / vñ wolle solche sünde er-  
kennen / Gott vmb vergebung bitten / vnd sich im  
Glauben / des lieben HErrn Ihesu Christi trö-  
sten / Hinfürder solchem laster von herten feind  
werden / sich dafür hüten / vnd alle die seinen da-  
von abweisen.

¶

Das

## Wider den

Das helffe vns Gott / vnser lieber Vater /  
durch seinen heiligen Geist / vmb Ihesu Christi  
seins lieben Sons vnser einigen Seligmachers  
willen / Amen.

Hab ich vnrecht geredt / so beweise es / das es  
vnrecht sey / Hab ich aber recht geredt / Warumb  
wolstu es nicht annemen?

# Beweisung das das halb vnd gantz sauffen sünde / vnd in Gottes wort ver- boten sey.

Es haltens viel dafür / als sey das halb vnd  
gantz sauffen nicht sünde / weil es nicht in Gottes  
Wort verboten sey. Sie meinen aber / weil diese  
wort / Sauffet nicht zu halben vnd gantzen / nicht  
in der schrift stehen / sey es nicht darinnen ver-  
boten.

Das aber solchs in Gottes wort verboten sey /  
wil ichs auffs deudlichst beweisen / Also / das ein  
ieder vernünfftiger Mensch wird bekennen müs-  
sen / das es war sey / das halb vnd gantz sauffen sey  
in Gottes wort verboten.

Von

## Sauffrenffel.

Vor das erste ist ja gewis / das das sauffen in Gottes Wort verboten ist / vnd ist keinerley sauffen ausgenommen. In heist das halb vñ ganz sauffen ja auch gefoffen / Denn Sauffen (wie wir droben / auch gehört) heisst / alles das / da man mehr in leib genusst / denn die notturfft foddert / Es geschehe gleich auff wasserley weise es geschehe / Wã sauffe zu halben oder ganzen / gemessen oder vñ gemessen / bier oder wein / So folget je / das das halb vnd ganz sauffen auch in Gottes wort verboten ist. Denn wie die Gelerten sagen / Posito genere, omnes species ponuntur: Oder / Prohibito genere, omnes species prohibentur. Ob gleich eben diese wort / Saufft nicht zu halben vnd ganzen / in der Schrift nicht funden werden. Des nim grobe gleichnisse.

Da Sanct Paulus zum Römern am 12. Capit. spricht / Segnet die / so euch verfluchen / Segnet vñnd fluchet nicht. Da verbeut Gott durch S. Paulum alles fluchen / vñnd nimpt keins aus / Er spricht nicht / fluchet nicht / ausgenommen / so vnd so / sondern spricht schlecht / fluchet nicht. Darumb wer das nerrisch geredt / so jemand spreche / Die Pestilenz fluchē ist nicht sünde / sondern nur ein geringer (wie jene sagten) Hausfluch / den es sey nicht in Gottes wort verboten / das fluchen sey wol verboten / aber die Pestilenz fluchē nicht / denn es stehe nirgend in Gottes Wort / fluchet nicht die Pestilenz.

¶ ij Item /

## Wider den

Item / da Gott spricht / Du solt nicht tödten / Da verbent Gott alles tödten / vñ nimpt keine weise zu tödten aus / Den er spricht nicht / Du solt nicht tödten / ausgenommen so vnd so / sondern spricht schlecht / Du solt nicht tödten. Darumb / wer das abermals herrisch geredt / wenn jemand spreche / Ein Menschen mit einer Büchsen zu tod schiessen / ist nicht sünde / denn es ist von Gott in seinem wort nicht verboten / Tödten ist wol verboten / aber mit einer Büchsen zu tod schiessen nicht / denn es stehet niergend geschrieben / Du solt niemand mit einer Büchsen zu tod schiessen.

Item da Gott spricht / Du solt nicht stelen / da verbent er alles stelen / keins ausgenommen / Er spricht nicht / Du solt nicht stelen / Ausgenommen dis oder jens magstu wol stelen / sondern sagt schlecht / Du solt nicht stelen. So wer nun dis abermal herrisch geredt / wenn jemand spreche / Brot stelen / oder öpffel vnd birnen stelen / ist kein sünde / denn es ist nicht in Gottes wort verboten / Stelen ist wol verboten / aber öpffel vnd birnen / oder brot stelen nicht / Denn es stehet niergend geschrieben / Du solt nicht öpffel vnd birnen / oder brot stelen.

Eben also auch / da Gott das sauffen verbent / vnd spricht / Hütet euch / das ewer hertzen nicht beschweret werden / mit fressen vnd sauffen / Item / kein Senffer sol das reich Gottes erben. Galat. 5. Da verbent Gott alles sauffen / keins  
aus

## Sauffteuffel.

ausgenommen / denn er spricht nicht / Hüret euch  
vorm sauffen / ausgenommen zu halben vnd ganz  
gen möget ihr wol sauffen / sondern er spricht  
schlecht / Hüret euch vorm sauffen / Luc. 21. So  
ist nun das freilich auch nerrisch geredt / weñ man  
spricht / Das halb vnd ganz sauffen ist nicht sün-  
de / denn es ist in Gottes wort nicht verboten /  
Sauffen ist wol verboten / aber halb vnd ganz  
sauffen nicht / Denn es steht niergendt geschrie-  
ben / Saufft nicht zu halben vnd ganzen.

Wenn Kinder also redten / so könnte mans jnen  
nicht vorübel haben / Aber nun thuns auch wol  
offte alte erfarn leute / vnd wollen eben ire grosse  
kunst vnd flugheit damit beweisen.

Woher kompt aber solche weise / Gottes wort  
also zu meistern / welchs man doch keinem weltli-  
chen fürsten thun dörfte / Ja kein Mensch / wie  
elend vnd gering er ist / wils leiden / das man sein  
wort meistere ? Woher kompts denn ? Gewislich  
nirgends her / denn von dem groben / tölpischen /  
sewischen Teuffel / dem leidigen Sauffteuffel.

So mercke nun vnd wisse / das das halb vnd  
ganz sauffen / in der Göttlichen schrift verboten  
ist / nemlich an allen örten / wo das sauffen verbo-  
ten ist.

Zum andern ist es ja auch gewis / das der mis-  
brauch der Creaturn Gottes in der schrift verbo-  
ten ist / Halb vñ ganz sauffen aber / ist je ein gros-  
ser misbrauch der Creaturn Gottes / so folget  
das es auch verboten ist.

L ij Den

## Wider den

Denn Mißbrauch heißt (wie alle vernünfftige Menschen bekennen müssen / wenn man ein ding vnnützlich oder anders / denn es von Gott geordnet ist / gebraucht. Gleich wie widerumb ein ding recht gebrauchen heißt / weñ mans mit danck sagung / zur notturfft nach Gottes willen / vnnnd nicht wider Gottes willen / Gott zu ehren / vnnnd nicht zur schande / gebraucht.

Tu wird ja die edle Creatur Gottes / der wein oder bier / weñ man zu halben vnd ganzen seufft / oder gemessen bier trinckt / nicht nach notturfft / sondern vnnützlich / anders denn es Gott geordnet hat / nicht Gott zu ehren / sondern viel mehr zur schande / nicht dē leibe zum besten / sondern zu grossem schaden gebraucht / Darauff ein mal schwere rechen schafft folgē wird. Wer wil nun sagen / das das halb vnnnd ganz sauffen nicht sünde / vnnnd in Gottes wort nicht verboten sey?

So mercke vnnnd wisse nun abermals / das das halb vnnnd ganz sauffen in der heiligen Schrift verboten ist / nemlich / vberal / wo der mißbrauch der Creaturn Gottes verboten ist. Als Proverb. 10. Luc. 16. Rom. 8. vnnnd an allen örtern / wo Gott befihlt / wie man seine Creaturn recht brauchen sol.

Zum dritten ist ja auch gewis / das ergernis geben in Gottes wort verboten ist / Mit halb vnd ganz sauffen aber gibt man ergernis / So folget je  
drans

## Sauffreuffel.

drans / das das halb vnd ganz sauffen in Gottes wort verboten ist.

Das man aber mit halb vnd ganz sauffen erger nis gebe / ist offenbar / Senn viel die dich sehen halb vnd ganze sauffen / meinen es sey also recht / vnd thuns auch. Ob du nun gleich mit müssen austrinckē möchtest / oder bey zeit auffhörest / das du nicht trincken würdest / oder nur aus kleinen kendlin oder kreuslein trinckest / vnd geschicht aber in dem namen / als soltens halb oder ganze sein / so ergerstu gleich wol deinen Nehesten. Solchs wirstu nimermehr verantworten können. Senn wehe dem Menschen / sagt Christus / durch welchen erger nis kompt. Du möchtest wol vielleicht bey zeiten auffhören vnd nüchtern bleiben / Wie wiltu aber die / so du mit dein halb vnd ganz trincken geergert / vberreden / das sie auch bey zeiten auffhörē / oder ob sie einmal auffhörten / das sie andermal auch auffhören würden?

Vnd ob wir gleich kein ander vrsache hetten / das halb vnd ganz trincken zu vnterlassen / so solte vns doch dis allein vrsache gnug sein / das vnser Nechster dadurch geergert wird. Senn wo wir in ein vrsache sein zu sünden / halb vnd ganz zu sauffen / Oder so ers vorhin auch getrieben hette / darinnen zuuerharren / weil er sehe / das wirs auch theten / so machten wir vns schuldig alles des vbelis / das er sein lebenlang darauff vbete / da behüte Gott alle fromen Christen für.

So

## Wider den

So mercke vnd wisse nun abermals / das das halb vnd ganz sauffen sünde / vñ in Gottes wort verboten ist / nemlich vberall / wo ergernis zu geben verboten ist.

## Beschlus.

Weil es nun gewis ist / das das halb vnd ganz sauffen sünde / in Gottes wort verboten / auch vnter dem sauffen (wie gehört) begriffen wird / so sol man auch alles das vom halb vnd ganz sauffen verstehen / was droben vom sauffen gesagt ist / vñ eben vmb der selben vrsachen willen solchs fliehen vnd meiden.

Vnd wil hiemit jederman auff's trewlichste vō Gottes wegen gewarnet / vermanet vnd gebeten haben / das er das halb vnd ganz sauffen / als ein Teufflich / Vnchristlich / schädlich vnd ergerlich laster / Gott zu ehren / vñd jm selbs zum besten / gang vnd gar vnterlassen wölle.

Wer sich nun wird warnen lassen / vnd trewem rath folgen / wol jm / es wird in ewiglich nicht gerewen / vnd wird sein grosser nutz sein / wo er auch solchs Gott zu ehren vñd zugefallen thun wird / so wird in Gott wider ehren / wie er sagt / 1. Samuel. 2. Wer mich ehret / den wil ich wider ehren.

Wer aber diesen trewen rath vñd warnung verachten / vnd nicht annemen wird / Wehe jm / Es wird in in ewigkeit gerewen / vnd wird sein hie  
zeit



## Sauffteuffel.

zeitlich vnd dort ewiglich schaden leiden. Denn  
wem nicht zu rathen ist / dem ist auch nicht zu helf  
fen. Sein blut sey auff seinem kopffe / Er wird nicht  
sagen dörffen / das ers nicht gewust habe / es ist  
im deudlich gnug angezeiget worden. Gott helffe  
vns / das wir frömer werden / Amen.

Hab ich vnrecht geredt / so beweise es / das es  
vnrecht sey / Hab ich aber recht geredt / Warumb  
wolstu es nicht annemen?

## Etliche Einreden der Beuffer / mit iren ver legungen.

Wie kompts das etliche Predi  
ger izund so offte vom Sauffen predigen /  
vnd so harte drauff dringen?

Antwort / Das sie dawider predigen / da thun  
sie recht dran / weil es sünd vnd von Gott verbo  
ren ist. Da sie aber so offte dawider predigen / ge  
schicht auch billich / denn es ist ein solchs laster /  
das man izund vor kein laster vnd sünde / sondern  
vor eitel recht vnd tugent helt / wie man sibet /  
das die gelobet vnd gerhümet werden / die nur  
wol sauffen können / dagegen die verachtet vnd

f ver

## Wider den

verspottet werden / die es nicht thun können oder  
wollen. Darumb ist von nöten / vnd sind alle  
Prediger von Ampts wegen schuldig / wider dis  
vnd alle andere laster / die man sonderlich nicht  
viel achtet / noch vor sünde erkennet / vor allen an  
dern lastern offte vñ auff's heftigste zu predigen /  
damit noch etliche danon gewiset werden / vnd  
niemand am Jüngsten tage entschuldung vorwei  
den künde / als sey er nicht gewarnt worden.

## Sol man denn nicht essen

vnd trincken?

Essen vnd Trincken wird nicht verboten / son  
dern fressen vnd Sauffen.

Warumb sind denn die Creaturen  
von Gott geschaffen / wenn wir sie nicht  
gebrauchen sollen?

Sagt doch niemand / das man sie nicht ge  
brauchen solle / Der rechte gebrauch wird nicht  
verboten / sondern der missbrauch der Creaturen  
Gottes.

## Wit der weise müsten wir

alle Mönche werden.

Wie so? Warumb? Weinstu darumb / das wir  
die Creaturen zu gebrauchen verbieten / wie sie den  
Mönchen verboten sind worden? Solchs haben  
wir niemals gethan.

Es ist wol des fleisches art also / das es schlecht

die

## Sauffrenffel.

Die mittel strasse nicht treffen / noch gehen kan /  
noch wil / Es wil entweder gar zu weit auff die rechte /  
oder zu weit auff die lincke seite / Als /

Verbeut man vbrigen schmuck / so verstehens  
etliche / man solle gar schlammig / vnrein / vnd  
zurissen gehen. Verbeut man aber schlammig-  
keit / so verstehens etliche / man solle sich in Gold  
vnd Silber / Sammat vñ Seiden / schmuckē etc.  
So mans doch also meiner / das man sich fein ein-  
feltig / als den Christen gebürt / 1. Pet. 3. vñ doch  
fein reinlich kleiden sol. Vnd da man sich ja schmü-  
cken wolte oder solte / das sich ein jeglichs nach sei-  
nem stande / vnd nach seinem vermügen oder reich-  
tumb schmücke vnd nicht drüber / fare / wie leider  
izund von vielen geschicht.

Also auch / wenn Gott saget / Sauffet euch  
nicht vol Weins / so verstehens etliche / als die  
Mönche / man sol kein wein noch bier trincken /  
Widerumb / da David saget / Der Wein sey von  
Gott geschaffen / das er des Menschen hertze er-  
frewen sol / verstehens etliche / das man im Wein  
vnd Bier sauffen vnd schwelgen solle.

Gottes Wort aber / vnd alle trewe Pre-  
diger / haben den Wein vnd Bier / noch eini-  
ge Creatur Gottes / niemals verboten / vnd  
widerumb das Sauffen vnd misbrauch der Crea-  
turn niemals gebillich / Sondern leren die  
mittelstrasse / Als nemlich / das man Wein vnd  
Bier / vnd ander Creaturn / so sie Gott einem

f ij besche

## Wider den

bescheret / nicht verachtē sol / sondern solo zu dāck  
von Gott annemen / vnd zu Gottes ehr gebrauch  
chen / wo sie aber Gott einem nicht bescheret / sol  
er gedult haben / vnd jm lassen gnügen / vund die  
weil das wenige mit danck sagung gebrauchē / was  
Gott bescheret hat.

Meinstu aber du müssest ein Mönch werden /  
darumb das du ein eingezogen Christlich leben für  
ren solt. So müste drans folgen / das man nicht  
kōnte noch dürffte Christlich vnd Gottselig lebē /  
oder Gottes geboten gehorsam sein / vnd sich vor  
sünden hüten / man würde denn ein Mönch. Da  
solte die Möncherey noch wol widerumb auffko  
men / vnd solte noch wol war werdē / wie man vor  
zeiten / ins Teuffels namen vorgab / Wer Gottse  
lig leben wolte / der solte in ein kloster gehen.

Mein Bruder hieher / du kanst dich wol vorm  
sauffen (mit Gottes hülffe) vnd vor andern gro  
ben lastern hüten / bist auch schuldig zu thun / vñ  
darffst darumb kein Mönch werden.

**Ey / ich halte es dafür / das es**  
nicht sünde sey / ob man gleich ein  
guten rausch trincket.

Wie? Ein rausch (wie du es meinst) ist ja ein  
vberflus / denn wer ein rausch hat / der ist je nicht  
nüchtern. Ist er nicht nüchtern / so kan er nicht be  
ten / so wir doch allezeit beten sollen / weil wir alle  
zeit in fahr schweben / Denn Gott leret vns / wir  
sollen

## Sauffteuffel.

sollen nüchtern zum gebet sein / 1. Pet. 4. So folget / das ein rausch trincken / sünde sey / vnd der wegen zumeiden.

**I**ch bin nimmer andechtiger zum Gebet / denn wenn ich ein rausch habe.

So mus Gott vnrecht sein / vñ vnnötige ding leren vnd gebieten / da er spricht / (Man sol nüchtern zum gebet sein / dieweil es nicht von nöten ist / oder man andechtiger ist / weñ man ein rausch hat. Sihe aber du zu / das dich der Sauffteuffel auff diese weise nicht betriege / vnd weñ du am meisten das gebet bedarffst / dein hertz (wie Christus spricht) beschwert sey / vñ verschwinde also Hebet vñ angacht. Du hast gut betē / weil du noch on anfechtung bist / vnd der Teuffel dich / bis er seine zeit ersehret / zu frieden leset.

**I**ch mus ja ein Bette trincken / ich kan sonst nicht schlaffen / Ich hab denn ein rausch?

Ja wol ein Bette. Lieber dencke im nach / Wer solchs treiben mus / vnd warumb? das du nicht schlaffen kanst / du seuffest denn ein rausch. Es ist eigentlich ein anfechtung vom Teuffel. Das kanstu drans mercken / das er dich darüber solch ding leret / das wider Gott ist. Gott saget / Saufft euch nicht vol / so blesst er dir ein / vnd spricht /

f ij Sauff

## Wider den

Sauff dich voll / das du schlaffen kanst. Solchs  
ist ganz widernander. So mus es ja der Teuffel  
thun.

Warumb thut ers aber? Gewislich vmb kei-  
ner andern vrsachen willen/ denn das er verhofft  
dich einmal in trunckener weile zu erwürgen/ oder  
dich in ander vnfal/ sünd vnd schand zu bringen/  
Denn wir Christen wissen (wie S. Paulus saget)  
was der Teuffel im sinn hat.

Warumb aber Gott solchs Creutze dir auffle-  
get/ vnd dem Teuffel verhenget/ das er dich nicht  
schlaffen lest / du seuffest dich denn voll / Ist diese  
vrsache/ das er dich probiren wil/ vnd sehen wie  
du dich vnter solcher anfechtung halten wilt / ob  
du auch dich vor seinem gebot fürchten/ oder dem  
Teuffel folgen wilt.

Wie solstu ihm denn thun? Da soltestu dem  
Teuffel mit Gottes wort widerstand thun/ vnd  
sagen/ Mein Teuffel/ das wil ich nicht thun/ denn  
es stehet geschrieben / Sauffet euch nicht voll/  
Item/ Seid nüchtern zum Hebet / vnd darauff  
Gott vleissig angeruffen vmb hülffe/ etc. Vnd  
das Creutze mit gedult getragē / bis Gott endert.

**S. Paulus spricht / Sauffet**  
euch nicht vol Weins / da wird  
des Biers nicht ge-  
dacht.

Das ist war/ aber dis auch war / dz die schrift  
wenn

## Sauffrenffel.

wenn sie wein nennet / alles starck getrencke damit  
meinet. Zum andern / so wird dennoch auch an  
etlichen enden / da vom sauffen geredt wird / auch  
des starcken getrencks ausdrücklich gewehret / als  
Prou. 20. 31. etc. Zum dritten / so haben die Ephe  
ser / zu welchen S. Paulus diese wort am ersten ge  
schrieben / nichts vom bier gewust. Zum vierden /  
so ist das sauffen vnd trunckenheit vor sich verbo  
ten / Es geschehe mit was getrencke es geschehe.

*hänglich  
Brot!*

**Wenn ich gleich zu halben vnd  
ganzen sauffe / wenn ich nur nicht  
truncken werde:**

Dis entschuldiget nicht / denn andere werden  
gleich wol dadurch geergert / etc.

**Ich sehe das jederman zu halben  
vnd ganzen senfft / was solich  
denn thun?**

Wenn gleich die ganze Welt vnrecht there /  
solstu drum auch vnrecht thun? Gott saget im  
andern Buche Mosi am 23. Cap. Du solt nicht fol  
gen der menge zum bösen.

**Wie wenn ich denn gezwungen  
würde / das ich ein halbes oder ganzes be  
scheid thun müste?**

Wer wil dich zwingen? vnd ob dich  
gleich jemand zwingen wolte (wie du meinst)  
damit

## Wider den

damit / das er vorgebe / Du soltest seine hulde nicht haben / Er wolte nicht dein freund hinfürder sein / Oder wolte dir dis vnd das an thun / wo du jm nicht bescheid therest / solstu dich drüb zwingen lassen / wider Gott vnd sein wort zu handeln / dein nechsten zu ergern / vñ dich vieler sunden teilhaftig zu machen: Solstu nicht / wo du ein Christ bist / ehr alles vmb Gottes gebots willen faren lassen / vnd leiden / denn das du dawider handeln soltest: Weil du aber vber Gottes gebot solch geringe ding nicht leiden wilt / was soltestu denn thun / wo man dir vmb Gottes worts willen herter zusetzen würde / das es blut kosten solte: O der zarten Werterer / die auch nicht eins geringen Menschens vngunst auff sich laden wollen / vñnd dafür lieber wider Gott handeln / vñnd Gottes hulde verlieren.

**Wie aber / wenn mir mein Herr**  
eins zu trincke / solte ich jm nicht gehorsam sein / vnd bescheid thun?

Nein / denn da heists / Man mus Gott mehr gehorsam sein / denn den Menschen / Act. 5.

**So wirds nicht recht gered sein /**  
das man spricht / Ses Brot ich esse / des lied ich singe.

Es ist recht geredt / wenn mans nur recht ver-  
stehet / Als nemlich / so mans nach dem spruche richtet / Man mus Gott mehr gehorsam sein / den den Menschen. Du



## Wider den

Su solt des brodt du issest / das ist / deins Herren lied singen / das ist / reden vnd thun / was ihm wolgefelt / ausgenommen wo er dir etwas für singet / das ist / befihlt / das du weist / das es wider Gott ist / so soltu jm nicht nach singen.

Denn du must ja bekennen / das Gott auch dein Herr ist / vnd das du vornelich sein brot issest / wie du alle tage betest / Unser teglich brot gib vns heute / So wil je folgen / das du vor allen dingen sein Lied singen / das ist / reden vnd thun solt / was jm wolgefelt.

**Wenn ich denn gleich bescheidt**  
thete / das nur ich niemand zwünge?

Das hilfft nicht / wird doch nicht dauon gehandelt / ob du ein andern zwüngen solt oder nicht / sondern dauon / das du nicht zu halben oder ganzen sauffen solt.

**Wie wenn ich denn Artzney gebrauchete** / das ich nicht truncken würde?

Dennoch sündigestu / deñ nicht allein Trunckenheit ist vō Gott verbotē / sondern auch das Sauffen. Vber das / ergerstu auch deinen Nächstten.

**Stehet doch im CIII. Psalm /**

Du bringest den Wein aus der Erden / das er des Menschen hertz erfrewet.

Es stehet freilich alda / aber damit ist noch lange nicht beweisert / dz du sauffen mögest / Sondern David wil damit Gottes wunder vñ güte vns für

G

bilden

## Wider den

bilden/ vnd preisen/ das er den Wein geschaffen/  
vnd im solche krafft gegeben hat/ das er von natur  
des Menschen hertze erfrewen kan.

Den der Wein hat von Gott die krafft vñ art/  
dz er vō natur/ nicht wen mā in seufft/ sondern vō  
natur/ so er messig getrunckē wird / alle adern im  
menschē durchdringet/ erfrischt vñ frōlich macht.

Auff diese meinung sager auch Jesus Syrach/  
am 32. Cap. Der Wein erquickt dē Menschen das  
lebē/ so man in messiglich trincket / Vñ was ist dz  
leben/ da kein Wein ist? Der Wein ist geschaffen/  
dz er den Menschen frōlich sol machen. Der Wein  
zur nochturfft getruncken/ erfrewet leib vnd seele/  
Aber so man sein zu viel trincket / bringet er das  
hertzeleid. Sihe da / wie richtig redet Jesus Sy-  
rach von der sachen.

## Sol man denn gar nicht zur Gesellschaft gehen?

Zur Gesellschaft zugehen/ wird nicht verbotē/  
sondern dz vngöttliche wesen/ welchs alda getrie-  
ben wird/ Wen die Christen zusamē komē / sollen  
sie gleichwol bedencken/ das sie Christen sind/ vnd  
sollen alda nicht dem Teuffel/ sondern Gotte die-  
nen/ Nicht fressen vnd sauffen/ sondern der gaben  
Gottes mit danck sagung/ vñ mit der furcht Got-  
tes genieffen/ nicht spielen/ nicht vnzüchtige redē  
vñ geberde führen/ sondern dafür etwas gutes sin-  
gen oder lesen/ oder vō Gottes wort redē/ sich ein-  
ander der predigt erinnern/ vñ Gottes wun-  
der

## Sauftreffel.

derwerck in den Creaturn bedenkē. Wie der Prophet Jesai. am 5. auch leret / dz man in der Gesellschaft Gottes werck vnd wunder betrachten sol.

Von solchē zusammen komen / vnd Gesellschaft halten / leret auch S. Paulus zun Ephesern am 5. Cap. da er spricht / Sauffet euch nicht vol weins / daraus ein vnōrdig wesen folget / sondern werdet vol / das ist / Wolt jr ja vol werden / so werdet vol des heiligen Geistes / vnd redet vnternander von Psalmē vnd lobsengen / vnd geistlichen Liedern / singet vnd spielet dem HErrn in ewerm hertzen / vnd saget danck allezeit Gott vnd dem Vater / im Namen vnser HErrn Jesu Christi. Sihe / das wer Christlich Gesellschaft gehalten.

Kemestu aber in ein Gesellschaft / da es anders zugienge / da dem Teufel vnd nicht Gotte gedienet würde / Du hettest aber hoffnung / das noch etliche vnter jnen / durch dein reden vnd Exempel / gebessert möchtē werden / so möchtestu wol bey jnen bleiben / aber nicht solchs mit jnen treiben / vnd dich irer sünden teilhaftig machen / sondern also sagen / wo sie dich bey jnen dulden kōnden / woltestu gern bey jnen sein / Wo aber gar keine hoffnung wer / oder sie dich zu jrē vngottseligem wesen dringen wollē / so heissets: Noli esse in cōuiujs potatorum, Sey nicht vnter den Seuffern vnd schlemmern / Prou. 23. Item / Nolite effici participes eorum, Seid nicht ire Mitgenossen / Ephes. 5. Als denn mache dich nur weit dauō / das dich Gott nicht etwa mit jnen straffen möchte.

G ij Ich

## Sauffreuffel.

**I**ch gedechte aber auff einer  
Hochzeit gienge es hin/ dem Ehe-  
stand zu ehren?

Was wider Gott ist / das kan dem Ehestand  
nicht zu ehren geschehen / sondern viel mehr zur  
schande. So nimpt auch Gott keinen ort aus / da  
er das sauffen verbeyt / sondern spricht schlecht /  
Sauffet euch nicht vol / vnd setzet nicht dazu / Es  
sey denn auff der Hochzeit / etc.

**H**aben sie doch auff der Hochzeit  
zu Cana in Galilea / da Christus auch vorhanden  
gewesen / sich auch truncken getruncken?

Das mag wol sein. Es folget aber nicht draus /  
das du es auch drum thū müssest / Deñ / Exempla  
nō probāt. Es schlenst nicht / das du wilt sagē / Die  
vñ die habens gethan / drum mag ichs auch thū /  
Das schlenst sich aber sehr wol / Gott hat Trun-  
ckenheit verboten / darumb soltu dich nicht trun-  
cken trincken. Zu dem / so folget auch nicht / das es  
alles müst recht sein / was jene auff der Hochzeit  
zu Cana gethan haben.

Ja sprichstu / Christus ist gleich wol auch auff  
der selbigen Hochzeit gewesen : Das ist war / er ist  
aber nicht vmb der Trunckenbolden willen alda ge-  
wesen / so hat er auch nicht mit gesoffen / vñd sich  
truncken getruncken.

Er hat sie aber nicht drum gestrafft : Ant-  
wort / Was weistu : Ist doch nicht alles geschrie-  
ben / was er gethan hat (wie Johannes sagt 20)  
Vnd

## Sauffrenffels

Vnd ob er sie gleich nicht gestrafft hette / so ist er von des wegen nicht alda gewesen.

Er hat ihn aber noch mehr Wein geschaffen: Recht / Aber nicht den Trunckenbolden zu gefallen / sondern dem Ehestand zu ehren / vnd Braut vnd Breutgam / vnd allen Eheleuten zu trost.

**Wenn man sich den gleich in der wochen einmal / nemlich am Sontage / truncken trincke?**

Nein / Gott sagt abermal schlecht / Sauffet euch nicht vol / vnd setzet nicht dazu / Es sey denn in der wochen ein mal / oder am Sontage. Darüb wil er / wir sollen vns allezeit dafür hüten.

### Ey / Einmal gehet hin.

Es sey einmal oder zweimal / so ist vnrecht. Dis Sprichwort / Einmal gehet hin / wird offte misbraucht / Denn wenn mans gebrauchen wil / die sünden damit zu entschuldigen / so ist vnrecht / Als hie / vom halb vnd gang sauffen / Vnd wenns bey dieser sünden recht wer / So möchte mans auch von allen sünden reden / Als vom Ehebruch / möchte man auch sagen / Ein mal gehet hin. Item vom stelen / etc. Sihe / da wolte der Teuffel gerne hinaus / das wenn du es an einer sünden gewonest / mit den andern auch also leichtfertig handelst.

Dis Sprichwort wird aber recht gebraucht / wenn man von jemand etwas vnbillichs erdulden mus / das man doch mit gutem gewissen erdulden

G iij kan /

**Wider den**  
Ea/ das man spricht/ Wolan/ Einmal gehet hin/  
sonderlich wenn die/ so vnter vnser gewalt seind/  
etwas verschulden/ da man hoffnung hat/ es sey  
nicht aus einem mutwillen geschehen/ das man sa-  
ge/ Wolan/ Einmal gehet hin/ kom zum andern  
mal nicht wider.

**Ey/ Ich weis es nicht aller**  
ding zu lassen.

Wolan/ so fare hin/ so bistu auch kein Christ/  
vnd hast den Christen namen verleugnet/ Denn  
werestu ein Christ/ vnd gleubest an Jesum Chris-  
tum/ so würdestu im auch gehorsam leisten.

Ich wil hiemit vor Gott vnd aller Welt ent-  
schuldiget sein.

**Ich sehe das die Pfarherrn**  
auch zu halben vnd ganzen sauffen?

Ob etliche Pfarherr thun/ da erger dich nicht  
an/ sie werden rechen schafft drum geben müssen.  
Dir aber ist nicht befohlen von Gott/ das du thun  
solt/ was dein Pfarherr thut/ sondern das du hö-  
ren vnd thun solt/ was er dir aus Gottes Wort  
vor saget. So wird auch Christus am Jüngsten ge-  
richte nicht fragen/ Ob du gethan hast/ was dein  
Pfarber gethan hat/ sondern ob du gethan hast/  
was du von im in der Predigt gehört hast.

**Lieset man doch/ das sich**  
Noah vnd Loth auch truncken ge-  
truncken haben.

Das

## Sauffrenffel.

Das ist war. Sihe aber was drauff gefolget  
ist/ vnnnd hüre dich. Die schriftt aber helt vns der  
lieben Heiligen sünde vnnnd gebrechen für/ nicht  
der meinung / das wir inen darinnen sollen oder  
mögen nach folgen/ sonst möchten wir alle die Ehe  
brechen/ weil David die Ehe gebrochen hat/ Son-  
dern es wird vns vorgehalten von Gott/ zur war-  
nung vnd zum trost. Zur warnung / das wir vns  
deste vleissiger vorm Teufel hüten/ vnnnd beten/  
weil er auch solche grosse Heiligē zu weilen zu fall  
bracht hat. Zu trost/ das wir nicht verzagē/ wenn  
wir gefallē sein / Weil auch solche grosse Heiligen  
zu weilen so gröblich gefallen sind / vnnnd hoffen /  
Gott der Vater aller Barmhertzigkeit / werde  
mit vnser schwachheit auch gedult habē/ wie er mit  
inen gedult gehabt hat/ vnd vns vmb seins lieben  
Sons willen/ vnser sünde vergeben/ Amen.

1. Corinth. 10.

Ihr esset oder trincket / oder was ihr thut/ so  
thuts alles zu Gottes ehren.

Dieser spruch solt billich vber den Tischen ges-  
schrieben stehen / das man ihn allezeit  
vor augen hette.

Gedruckt zu Leip-  
zig / Durch Georg  
Hantzsch.

Handwritten in blue ink: *1566*

Handwritten in blue ink: *X 220685*

Faint, mostly illegible text in a historical script, possibly Latin or German, arranged in several lines.

Another block of faint, illegible text in a historical script, located in the lower middle section of the page.


Large, stylized handwritten text in blue ink, possibly a signature or a title, featuring decorative flourishes.

Handwritten text in blue ink, appearing to be a date or a reference number: *212 / 1510*

Handwritten in blue ink: *24*







B.I.G.

Farbkarte #13

Q. H. 347, 1.

II i  
1566

Wider den  
**Sauffreuffel/**  
Etliche wichtige vrsachen/  
Warumb alle Menschen sich fur  
dem **Sauffen** hüten  
sollen.

Item/

**Das das halb vnd gantz**  
**Sauffen** Sünde/ vnd in Got  
tes Wort verbo  
ten sey.

Item/

**Etliche Einreden der**  
**Seuffer** / mit iren ver  
legungen.

Durch

**Matthæum Friderich** von  
**Hörlig.**

M. D. LII.

BIBLIOTHECA  
PONICKAVIANA

UNIVERSITÄTS-BIBLIOTHEK  
HALLE  
(SAALE)

